

I. DISPOSICIÓN XERAIS

PRESIDENCIA

Lei 13/2004, do 29 de decembro, de orzamentos xerais da Comunidade Autónoma de Galicia para o ano 2005.

Exposición de motivos

Os orzamentos de Galicia para o ano 2005 oriéntanse basicamente cara a dúas liñas de obxectivos, diferentes e ao mesmo tempo complementarias. Unha delas establece a prioridade das actuacións que favorezan a calidade do sistema produtivo e, a través del, o crecemento económico e a creación de emprego. O reforzamento dos *stocks* de capital público -por medio do Plan de dinamización económica e dos programas de construción de infraestruturas en áreas que aquel non prevé-, a mellora da dotación de capital tecnolóxico -con apreciables incrementos do investimento en I + D + I- e o apoio á iniciativa privada e á innovación empresarial forman parte dese primeiro grupo.

Outro eixe de actuación desenvólvese ao redor das prioridades de carácter social. Os programas de atención aos maiores e de conciliación da vida familiar e laboral, así como o considerable incremento das asignacións postas á disposición dos servizos sanitarios, evidencian a decidida vocación social destes orzamentos, onde a política educativa e moi especialmente a referida ao ensino universitario, que participan de características propias de ambos os bloques de actuación prioritaria, dispoñen igualmente de dotacións significativas que se corresponden coa importancia do papel estratéxico que desempeñan.

Pola súa parte, no texto articulado da lei aparecen incluídas, no título I, as referencias á aprobación dos orzamentos, aos créditos que se autorizan e aos recursos que os financian, así como as normas que permitirán se é o caso realizar as modificacións precisas para unha mellor execución orzamentaria. As retribucións de persoal, que se adecuan ao establecido na normativa estatal de carácter básico, constitúe a materia do título II. As autorizacións de endebedamento, que teñen pleno encaixe no marco dos acordos sobre estabilidade e crecemento, trátanse no título III. A modificación dos tipos das taxas de contía fixa, e algúns das de contía variable, aparece recollida no título IV. Finalmente, o título V resérvase para a inclusión de normas que buscan favorecer a eficiencia dos procedementos de xestión orzamentaria, mentres que en disposicións adicionais se establece a constitución dun fondo salarial, cuxa distribución será tratada no ámbito da mesa xeral de negociación da función pública, ao mesmo tempo que se prorroga a vixencia dos criterios de distribución do Fondo de Cooperación Local utilizados no anterior exercicio, que se manterán en tanto non sexan modificados pola Comisión de carácter mixto que ten atribuídas esas competencias, e determínase, por outra parte, o réxime conforme o que

se realizará no ano 2005 o financiamento das universidades galegas.

Por todo o exposto o Parlamento de Galicia aprobou e eu, de conformidade co artigo 13.2º do Estatuto de Galicia e co artigo 24 da Lei 1/1983, do 23 de febreiro, reguladora da Xunta e do seu presidente, promulgo en nome de El-Rei, a Lei de orzamentos xerais da Comunidade Autónoma de Galicia para o ano 2005.

TÍTULO I

Da aprobación dos orzamentos e das súas modificacións

Capítulo I

Os créditos iniciais e o seu financiamento

Artigo 1.-Aprobación e ámbito dos orzamentos xerais.

O Parlamento de Galicia aproba os orzamentos xerais da Comunidade Autónoma para o ano 2005, nos que se integran:

a) Os orzamentos da Administración xeral.

b) Os orzamentos dos organismos autónomos.

c) Os orzamentos de explotación e capital das sociedades públicas de carácter mercantil.

d) Os orzamentos das demais sociedades públicas ás que se refire o artigo 12 do texto refundido da Lei de réxime financeiro e orzamentario de Galicia, aprobado polo Decreto legislativo 1/1999, do 7 de outubro.

Artigo 2.-Orzamentos da Administración xeral e dos organismos autónomos.

Un.-Nos estados de gastos consolidados dos orzamentos da Administración xeral da Comunidade Autónoma e dos seus organismos autónomos consígnanse créditos por importe de 9.090.326.907 euros, distribuídos da forma seguinte:

Organismo	Cap. I-VII Gastos non financeiros	Cap. VIII Activos financeiros	Cap. IX Pasivos financeiros	Total
Administración xeral	5.471.871.384	112.422.904	386.530.937	5.970.325.225
OO.AA. administrativo	2.908.827.797	625.053		2.909.452.850
OO.AA. comerciais, industriais e financeiros	203.072.808	7.476.024		210.548.832
Total	8.583.271.989	120.523.981	386.530.937	9.090.326.907

As transferencias internas entre os orzamentos da Administración xeral da Comunidade Autónoma e os dos organismos autónomos representan 2.853.996.666 euros, distribuídos segundo o seguinte detalle:

Orixe	Destino		
	OO.AA. administrativos	OO.AA. comerciais, industriais e financeiros	Total
Administración xeral	2.729.141.841	124.854.825	2.853.996.666
Total	2.729.141.841	124.854.825	2.853.996.666